

## الفاجومي

### لماذا أحترم الحكومة؟

« أين اختفى الشاعر وكيل النيابة الذي قال «يا  
 بلديا يا عجيبة / فيكي حاجة محيراني / نزرع القمح  
 بصعوبة / يطلع القرع في ثواني..؟  
 « طردت من حوش آدم.. ونفذ الطرد صديق فنان  
 وجار ماجور.

obeyikan.com

بذل فؤاد قاعود جهد لإقناع شقيقه الأكبر علي سماع الشيخ إمام طوال القعدة  
عيني ما نزلت من علي الأستاذ علي، أوقات كانت عينه بتسافر بعيد.. وفجأه ترجع  
كلها حيويه.

بعد علي ما سمع سابنا وقام، وقام فؤاد.. خرج وراه.. ورجع فؤاد بعد شويه  
وقال لي:

- سألت علي عن رأيه فقال جملة واحده: دا شيء محترم..



إحنا النهادره زارنا النبي.. يا ألف ألف تلتيمت مليون مرحباً ويا عشرميت مليون  
هلا.. البيه النيابة بذات نفس شخصيته اتعطف واتلطف وشرف بيتنا الحقيير زاير  
مش قابض!!

أنا ربك والحق لما قدمهولي فؤاد قاعود:

- الأستاذ شريف وكيل نيابه.

الأول إنشائمت وقلبي انقبض.. ما انت عارف اللي بيني وبين الحكومه.. أنا  
صحيح باحترمها.. بس دا خوف مش حب.

لكن لما كمل فؤاد:

- الأستاذ شريف المنباوي شاعر زميلنا.

وكيل نيابه وزميلي؟! استنى بقى يا حكومه.. والله لأخليكي تقولى الحنه الفتل  
بكام الرطل.. ومين عارف مش يمكن يظهر لي زميل ظابط.. عمومًا أنا وانتى يا  
حكومه والزمن طويل.. شفتوا بقى فوايد الشعر؟

وبدأت أفرز الزميل الجديد.. شاب حليوه.. شعره مسبب وسايح زى شجيج

السيما ولابس بدله شياكه وفاكك الكرافته بالأطه ومبتسم بشده وسنانه بيضا وبتلمع  
زى إعلانات كولينوس وبدأ البيه النيايه يسمعنا شعره عجبتنى الثقه والأطه اللي  
فى طريقه أداؤه وكن بعد كل جملة يقولها يبتسم ابتسامه الشخص اللي عمل مغرز  
ونجح فيه.



أنا بصراحة حببت الشخص ده بشده أكثر من شده ابتسامته.. حببت شعره  
البيسط اللاذع:

يا بلدنا عجيبه.

فيكى حاجه محبرانى.

نزرع القمح بصعوبه.

يطلع القرع فى ثوانى.



(على فكره.. فيه ناس بينسيوا البيتين دول للشاعر محمود الماحى ودا مش  
صحيح.. أولاً لأن محمود الماحى ما كانش بيكتب شعر عامى.. ثانياً أنا سمعت  
بعض قصايدى منسوبه لمحمود الماحى.. فأرجوك تصحى للعمليه).

اندمج شريف المنباوى فى المجموعه وأصبح عضو عامل فى النادى وبقى يبجى  
لوحده.. وذات صباح دخل شريف صحانى م النوم.. وبعد ما فطرننا القول الشديده  
وعملنا الاصطباحه المتينه طلع من جيبيه ورقه وسمعنا منها أغنيه كان لسه كاتبها  
وعلى الفور دخلت المكنه م الناحيا دى طلعت م الناحيه الثانيه متلحته غنوه ظريفه  
لطيفه أربعه وعشرين قيراط ودخل فؤاد قاعود لقينا قاعدين نغنيها واللى نقوله  
نعياه... بصيت على وش فؤاد لقيته مبتسم ابتسامه المفاجئ..

بصيت على شريف لقيته بيوجه لفؤاد ابتسامه شديده.. وبعد ما انتهينا من الغنا  
دار بين فؤاد وشريف جدل من النوع الرهيب الشأن كان الخلاف على المطلع اللى  
يقول:

يام العيون المصراويه

يام العيون المش عاديه

كان رأى فؤاد إن عباره- المش عاديه- ركيكه وكان رأى شريف إنها جديده  
وجريئه.. وفى النهايه احتفظ كل واحد بوجهه نظره لكن بعد الواقعه دى بدأت

العلاقه بين فؤاد وشريف تتدهور رغم محاولاتي المستميتة فى إصلاح ذات البين وكان شريف يتعمد ييجى فى الأوقات اللى فؤاد ما بيكونش موجود فيها ويمشى قبل فؤاد ما ييجى.. مش فاكرا المسأله دى استمرت قد إيه وبدأ شريف يخفف من زيارته وأخيراً انقطع تماماً وفات لى حاجتين الحاجه الأولى كانت الانجراره المتلته عند بيع الصنف ودى مش مهمه لأنى سددها لكن الحاجه التانيه هى اللى فضلت كانت قصيده جميله كان كاتبها فى شخص لاداعى لذكر اسمه لأنه مات فى ستين داهيه.. لكن الشخص ده كان بيمثل نوعيه من الفنانين مازالت موجوده مع الأسف وتكاد تكون مهيمنه على عقول وأذواق الناس من خلال قنوات الإعلام اللى معششين فيها زي العنكبوت.

محمد محمد محمد صليب

مؤلف أغانى

وشاعر أديب

يجوز راح تقول

إن اسمه غريب

ولكن أفهم جنابك قوام

محمد محمد

ومسلم قوى

ويمكن يهودى لثيم ملتوى

ويمكن صعيدى

ومن ملوى

ويمكن منوفى

ويمكن مدام

ويمكن يقول للبصل

يا قمر

ويحلف

بأن البقرع الشجر

وفارش خدوده

لعالم غجر

وجاهز قفاه

لاحتمال القلام

•

مؤلف أغاني

ولكن بلا

وكاتب وشاعر

ويلعب جلا

وله في الحياه كلها مشكله

ملخصها كلمه - حثدفع لى كام-

وتدفع فيكتب

أدب بالطلب

تعوزه حماسي

تعوزه طرب

تعوزه فكاهي

يقول لك.. وجب

كأنك في مسمط

بتطلب طعام

ويعرف يزمر

لكل العهد

ويعسك كمنجه

ويلعب بعود

ولو مصر دي

يحكموها اليهود

حيصبح يهودي

ويمكن حاخام

•

وله حاسه سادسه

تشم الميول

وحافظ كويس

أصول الأصول

ويعرف يطاطي

ويعرف يقول

يعيش أى حاجه

ويضرب سلام.

ياترى فين أراضيك دلوقتي يا شريف؟ ... ولسه فاكر القصيده دي ولا نسيته؟

•••

حسن الموجي كان عنده قدره على اللعب بالألفاظ... مذهله... وذات يوم كنا قاعدين بربطه المعلم وحصلت دردشه في الشعر وقال وجيه القاباني:

- أنا ملاحظ إن أعراض الشعر اللي عند فؤاد قاعود أكثر تنوعاً منها عند نجم وده في ظني راجع لثقافته فؤاد وعشان كده يابو حميد لازم تقرا.

.. وكعاده سعد الموجي أسرع لنجدتي فقال:

- لا يابو حنان.. إسمح لي أختلف معاك.. أنا شايف إن ثقافته فؤاد هي ثقافته المؤسسه وأنا باعترف إنه حصل منها كتير لكن بنفس القدر نجم حصل من الثقافه الشعبيه... وعشان كده الطعم مختلف.

وحسم حسن الموجي المناقشه بلعبه من أعباه الظريفه.. خد أول حرف من أسمائنا فؤاد وأنا وركيها فطلعت كده.. أحمد فؤاد قاعود (أَقُّو) وأحمد فؤاد نجم (أَقْن) وضحكنا وانتهت الأزمه!!

فوجئت ذات يوم بفؤاد يقول لي:

- ممكن تستنى أنت شويه بقي؟

ما فهمتش.. قلت له:

- إزاي يعني؟

قال لي:

- تبطل كتابه شويه لإمام عشان يلحن الشعر... يقصد شعره هو.

قلت له:

- قوى قوى...

وفعلاً.. توقفت عن الكتابه.. لكن قلبي ما قدرتش أوقفه عن الفرح باللي بيحصل... كل يوم مولود جديد... وكل يوم نغمه جديده وكل يوم فرح جديد وأنا بنفس الحماس باغنى وأضحك وأفرح وأطير مع السرب السعيد.

وذات يوم كنا قاعدين بلحن كلام جديد لفؤاد... الشيخ إمام وأنا وفؤاد قاعود

وأعضاء شركة مصر للكهرباء والثوريه وكالعادة أبدت ملاحظه أو اقترحت شيء  
على الشيخ إمام مش فاكر.. ففوجئت بفؤاد يقول لى بمنتهى الغلظه:  
- اسكت أنت .

بصيت على وش إمام ما لمحتش أى تعبير.. وقررت السكوت.. حوالى سنه  
كامله عايشين مع بعض ناكل ونشرب ونتكيف وننام ونصحى لكن ساعه الغنا أقعد  
معاهم يرضه لكن بقى ما يفتحش ودى كانت أكبر عملية تعذيب اتعرضت لها فى  
حياتى لأنى ضعيف جداً أمام النغمه والكلمه والنكته.

بعد كده سافروا اسكندريه من غيرى وقعدوا اسبوع لحنوا فيه شويه حاجات  
وبعد رجوعهم بيوم رجع فؤاد من روز اليوسف ومعاه شخص أندى قوى أكثر من  
اليه النياحه ذات نفسه وكانوا جايبين معاهم ريكورد كبير- جرونديج- من أبو شرايط  
طاره زى بتاع أحمد الموجى وقال فؤاد للشيخ إمام:

- يا مولانا أنا جايب لك أخطر وأهم ناقد موسيقى فى البلد الأستاذ سليمان  
جميل الناقد الفنى بجريده الأهرام.

واتنتر الشيخ إمام على حيله وقال:

- أهلاً أهلاً.. وهل يخفى القمر.

وشغلوا التسجيل فبدأوا بالحاجات اللى اتلحنت فى اسكندريه وفوجئت بأن  
الشيخ إمام واخذ لحن قصيدتى- عصفور وصياد- ومركب عليه كلام لفؤاد قاعود..  
حسيت بسكينه بتعشش فى قلبى بصيت على فؤاد قاعود لقيتيه باصص على سليمان  
جميل بصيت على سليمان لقيتيه باصص على الشيخ إمام.. انسحبت جواً نفسى  
وواصلت السكوت.

بعد ما انتهت جلسه الاستماع قال سليمان جميل كلام كتير كل اللى فاكره منه.

- دا فن حقيقى والسكوت عليه جريمه.. ولازم ياخذ فرصته ولازم الناس

تسمعه...

وكلام من هذا القبيل... وقال الشيخ إمام كلام كثير برضه كان أهمه إن:

- أمه محمد بخير طالما فيها أمثال أستاذنا الجليل سليمان جميل راعي الفنون.

وتعهد الشيخ إمام بمواصله الليل بالنهار فى الإبداع وترك مهمة النشر للساده الأجلاء رعاه الفنون من أمثال سليمان جميل وخلافه.

بعد ما نزلوا وانفردت بالشيخ إمام سألته:

- إحنا يا إمام مش اتفقنا مالناش دعوه بالإذاعه والتلفزيون؟

ضحك وقال لى:

- انتوا مين؟

قلت له:

- أنا وأنت.

قال لى:

- خليك فى حالك.. خليك فى حالك.

وكان لازم أواصل السكوت.. فسكت.

يوم رجعت الظهر من المنظمه لقيت إمام وفؤاد ومحمد على قاعدين زى الى مات له ميت.. إمام منعكش دماغه وفؤاد بينفخ من مناخيره ومحمد على ما يبطلعش نفس... إيه العبارة؟ الجماعه راحوا للأستاذ راعي الفنون.. راحوا له البيت حسب الموعد المحدد... لقيوا إيه بقى؟

محمد على يقول لك:

- دا واد أفندى آخر صياعه... لكن مسيره يقع فى إدينا.. أدام مش عاوز يشوف خلقتنا... بيواعدنا ليه؟ لأ وإيه؟ حاطط لنا القفل والرزه ع الباب... أما دى عجيبه والله.. أنا م الأول ماكتتش مستريح له.

وقال الشيخ إمام:

- ما أنا ادبتها له في وشه... قلت له- ولتعرفنهم في لحن القول...  
(ملحوظة) على الطلاق بالتلاته ما حصل.

القصده.. نزل فؤاد وغاب يومين ورجع ثاني وفي يوم رجوعه رجعت من المنظمه  
الظهر دخلت الأوضه الصغيره اللي بانام فيها لقيت الكلیم مفروش في الأرض  
وفوقه طبقه من الخرا... كميته كبيره جداً ما أعرفش جابوها منين وعامل ريحه بشعه  
رجعت بضمهري ع الأوضه الكبيره لقيت الشيخ إمام ومحمد علي قاعدين.. سألت  
محمد:

- إيه يا محمد اللي على فرشتي ده؟

قال لي:

- خرا.

قلت له:

- مين اللي حطه؟

قال لي:

- أنا.

قلت له:

- ليه؟

قال لي:

- عشان تفارقنا.

- قلت له:

- وما قتلش ليه؟

قال لى:

- أدينى باقول لك.

قلت له:

- طيب أناح أخلص الشهر اللى لى وأمشى.

قال لى:

- لأ.. تمشى دلوقتى.

قلت له:

- أروح فىن؟

قال لى:

- تروح فى ستين داهيه.

وراح قايم مدور الضرب فى فأنا بادلته الضرب وفوجئت بجارنا الفوقانى نازل  
وماسك رقبه قزازة وعايذ يضربنى بيها.

حسيت إن المسأله مترتبه فقلت لمحمد:

- خلاص... أنا ماشى.

ومشيت..





لحم والشيخ إمام يتوسطهم محمد علي